

Masalah nelayan **bakal selesai**

JPS akan ambil langkah proaktif dalamkan muara sungai di Pintu Air Parit 10 Pasir Panjang

SABAK BERNAM - Jabatan Pengairan dan Saliran (JPS) Sabak Bernam masih dalam perancangan mendalamkan lagi muara sungai di Pintu Air Parit 10 Pasir Panjang yang cetek hingga menyukarkan nelayan keluar dan pulang dari laut.

Ahli Parlimen Sungai Besar, Budiman Mohd Zohdi berkata, nelayan di kawasan itu ketika ini terpaksa bergantung pada jadual pintu air dibuka di kawasan itu.

Bagaimanapun, beliau menjelaskan, nelayan berdepan kesukaran apabila pintu air yang berfungsi mengeluarkan air dari sawah bendang jarang dibuka hingga menyebabkan muara sungai kering-kontang dan berlumpur setiap kali air surut.

"Saya terima maklum ba-

las daripada pihak JPS Sabak Bernam akan segera atasi masalah itu termasuk mendalamkan lagi muara sungai ini.

"Saya difahamkan, kerja mendalamkan muara sungai sepanjang hampir 500 meter ini akan dibuat dalam waktu terdekat," katanya kepada Sinar Harian.

Budiman yang juga Adun Sungai Panjang berkata, selain kerja mendalamkan sungai itu, beberapa langkah turut dicadangkan nelayan kepada JPS, antaranya menggantikan pintu air lama kepada baharu.

"Nelayan cadang supaya pintu air sedia ada ini ditukar kepada sistem pintu air automatik yang boleh mengawal laluan keluar air dari sawah bendang ke sungai," katanya.



Budiman (kanan), Salfarina dan kakitangan JPS bersama-sama nelayan meninjau muara sungai berkenaan.

Selain itu, katanya, JPS juga diminta memantau jadual pintu air di kawasan

itu agar kejadian pintu air tidak dibuka yang mengambil masa hampir seminggu tidak

kembali berulang.

Budiman turut berterima kasih kepada Jurutera JPS

Sabak Bernam, Salfarina Mohd Sharif yang serius dan proaktif mengambil tindakan segera berhubung perkara itu.

"Masalah ini hampir selesai menerusi kaedah rundungan apabila JPS sendiri turun padang untuk bertemu dengan nelayan yang terlibat.

"Beberapa penyelesaian juga telah diambil dan kita harap masalah yang membelenggu nelayan di kawasan ini dapat diselesaikan dalam waktu terdekat," katanya.

Sebelum ini Sinar Harian melaporkan, kira-kira 60 nelayan pesisir pantai di Pasir Panjang merungut berikutan Pintu Air Parit 10 Pasir Panjang tidak dibuka mengikut jadual sepatutnya hingga merumitkan aktiviti penangkapan ikan di laut.